

宋

書

一八



十九 宋書志三十九

臣沈

約

新撰

百官上

太宰一人周武王時周公旦始居之掌邦治爲
六卿之首秦漢魏不常置晉初依周禮備置三
公三公之職太師居首景帝名師故置太宰以
代之太宰蓋古之太師也殷紂之時箕子爲太
師周武王時太公爲太師周成王時周公爲太師
周公薨畢公代之漢西京初不置平帝始復置

太師官而孔光居焉漢東京又廢獻帝初董卓
爲太師卓誅又廢魏世不置晉旣因太師而置
太宰以安平王孚居焉

太傅一人周成王時畢公爲太傅漢高后元年
初用王陵

太保一人殷太甲時伊尹爲太保周武王時召
公爲太保漢平帝元始元年始用王舜後漢至
魏不置晉初復置焉自太師至太保是爲三公
論道經邦燮理陰陽無其人則闕所以訓護人

主導以德義者

相國一人漢高帝十一年始置以蕭何居之罷丞相何薨曹參代之參薨罷魏齊王以晉景帝爲相國晉惠帝時趙王倫愍帝時南陽王保安帝時宋高祖順帝時齊王竝爲相國自魏晉以來非復人臣之位矣

丞相一人殷湯以伊尹爲右相仲虺爲左相秦悼武王二年始置丞相官丞奉相助也悼武王子昭襄王始以樗里疾爲丞相後又置左右丞相漢高

帝初置一丞相十一年更名相國孝惠高后置
左右丞相文帝二年復置一丞相哀帝元壽二
年更名大司徒漢東京不復置至獻帝建安十
三年復置丞相魏世及晉初又廢惠帝世趙王
倫篡位以梁王彤爲丞相永興元年以成都王
穎爲丞相愍帝建興元年以琅邪王睿爲左丞
相南陽王保爲右丞相三年以保爲相國睿爲丞
相元帝永昌元年以王敦爲丞相轉司徒荀組
爲太尉以司徒官屬并丞相爲留府敦不受成

帝世以王道爲丞相罷司徒府以爲丞相府導
薨罷丞相復爲司徒府宋世祖初以南郡王義宣
爲丞相而司徒府如故

太尉一人自上安下曰尉掌兵事郊祀掌五獻
大喪則告諭南郊堯時舜爲太尉官漢因之武
帝建元二年省光武建武二十七年罷大司馬
置太尉以代之靈帝末以劉虞爲大司馬而太
尉如故

司徒一人掌民事郊祀掌省牲視濯大喪安梓

宮少昊氏以鳥名官而祝鳩氏爲司徒堯時舜
爲司徒舜攝帝位命契爲司徒契立孫之孫曰
微亦爲夏司徒周時司徒爲地官掌邦教漢西
京初不置哀帝元壽二年罷丞相置大司徒光
武建武二十七年去大

司空一人掌水土事郊祀掌掃除陳樂器大喪
掌將校復土舜攝帝位以禹爲司空契之子曰
冥亦爲夏司空殷湯以咎單爲司空周時司空
爲冬官掌邦事漢西京初不置成帝綏和元年

更名御史大夫爲大司空哀帝建平二年復爲御史大夫元壽二年復爲大司空光武建武二十七年去大字獻帝建安十三年又罷司空置御史大夫御史大夫郝慮免不復補魏初又置司空

大司馬一人掌武事司主也馬武也堯時棄爲后稷兼掌司馬周時司馬爲夏官掌邦政項籍以曹咎周殷竝爲大司馬漢初不置武帝元狩四年初置大司馬始直云司馬議者以漢有軍候千司馬官故加大及置司空又以縣道官有

獄司空又加大王莽居攝以漢無小司徒而定
司馬司徒司空之號竝加大光武建武二十七
年省大司馬以太尉代之魏文帝黃初二年復
置大司馬以曹仁居之而太尉如故

大將軍一人凡將軍皆掌征伐周制王立六軍
晉獻公作二軍公將上軍將軍之名起於此也
楚懷王遣三將入關宋義爲上將漢高帝以緯
信爲大將軍漢西京以大司馬冠之漢東京大
將軍自爲官位在三司上魏明帝青龍三年

晉宣帝自大將軍爲太尉然則大將軍在三司
下矣其後又在三司上晉景帝爲大將軍而景帝
叔父孚爲太尉奏改大將軍在太尉下後還復舊
晉武帝踐阼安平王子爲太宰鄭沖爲太傅王
祥爲太保義陽王望爲太尉何曾爲司徒荀顗
爲司空石苞爲司馬陳騫爲大將軍凡八公同
時並置唯無丞相焉有蒼頭字宜祿至漢丞相
府每有所關白到閣輒傳呼宜祿以此爲常丞
相置三長史丞相有疾御史大夫率百僚三日問

起居及瘳詔遣尚書令若光祿大夫賜養牛上
尊酒漢景帝三公病遣中黃門問病魏晉則
黃門郎尤重者或侍中也魏武爲丞相以來置
左右二長史而已漢東京太傅府置掾屬十人
御屬一人令史十二人不知皆何曹也自太尉
至大將軍車騎驃騎衛將軍皆有長史一人將
軍又各置司馬一人太傅不置長史也太尉府
置掾屬二十四人西曹主府吏署用事東曹
主二千石長吏遷除事戶曹主民戶祠祀農桑

事奏曹主奏議事辭曹主辭訟事法曹主郵驛
科程事尉曹主卒徒轉運事賊曹主盜賊事決
曹主罪法事兵曹主兵事金曹主負幣鹽鐵事
倉曹主倉穀事黃閣主簿省錄衆事御屬一人令
史三十二人御屬主爲公御令史則有閣下記室門下
令史其餘史闕案掾屬二十四人自東西曹凡
十二曹然則曹各置掾屬一人合三十四人也司
徒置掾屬三十一人御屬一人令史三十五人司空
置掾二十九人御屬一人令史三十一人司空別有

道橋掾其餘張減之號史闕不可得知也漢東
京大將軍驃騎將軍從事中郎二人掾屬二
十九人御屬一人令史三十人騎衛將軍從事
中郎二人掾屬二十人御屬一人令史二十四
人兵曹掾史主兵事稟假掾史主稟假又置外
刺茲主罪法其領兵外討則營有五部部有校
尉一人軍司馬一人部下有曲曲有軍候一人曲
下有屯屯有屯長一人若不置校尉則部但有
軍司馬一人又有軍假司馬軍假候其別營者

則爲別部司馬其餘將軍置以征伐者府無負
職亦有部曲司馬軍候以領兵焉案大將軍以
下掾屬與三府張減史闕不可得置令史御
屬者則是同三府也其云掾史者則是有掾而無
屬又無令史御屬不同三府也魏初公府職寮
史不備書及晉景帝爲大將軍置掾十人西曹
東曹戶曹倉曹賊曹金曹泉曹兵曹騎兵各一
人則無屬矣魏元帝咸熙中晉文帝爲相國相
國府置中衛將軍驍騎將軍左右長史司馬從

事中郎四人主簿四人舍人十九人參軍二十
二人參戰十一人掾屬三十三人東曹掾屬各
一人西曹屬一人戶曹掾一人屬二人賊曹掾一
人屬二人金曹掾屬各一人兵曹掾屬各一人騎兵
掾二人屬一人車曹掾屬各一人鎧曹掾屬各一人
水曹掾屬各一人集曹掾屬各一人法曹掾屬各一人
奏曹掾屬各一人倉曹屬二人戎曹屬一人馬
曹屬一人媒曹屬一人合爲三十三人散屬九
人凡四十二人晉初凡位從公以上置長史西閣

東閤祭酒西曹東曹掾戶曹倉曹賊曹屬各
一人加兵者又置司馬從事中郎主簿記室督各
一人舍人四人爲持節都督者置參軍六人安
平獻王孚爲太宰增掾屬爲十人兵鎧士營軍
刺姦五曹皆置屬并前爲十人也楊駿爲太
傅增祭酒爲四人掾屬爲二十人兵曹分爲左
右法金田集水戎車馬十曹皆置屬則爲二十
人趙王倫爲相國置左右長史司馬從事中郎四
人參軍二十人主簿記室督祭酒各四人掾屬

四十人東西曹屬其餘十八曹皆置掾則四十人矣凡諸曹皆置御屬令史學幹御屬職錄事也江左以來諸公置長史倉曹掾戶曹屬東西閤祭酒各一人主簿舍人二人御屬二人令史無定員領兵者置司馬一人從事中郎二人參軍無定員加崇者置左右長史司馬從事中郎四人掾屬四人則倉曹增置屬戶曹置掾江左加崇極於此也長史司馬舍人秦官從事中郎掾屬主簿令史前漢官陳湯爲大將軍王鳳從事

中郎是也御屬參軍後漢官孫堅爲車騎參
軍事是也本於府主無敬晉世太原孫楚爲大司
馬石苞參軍輕慢苞始制施敬祭酒晉官也漢吳
王濞爲劉氏祭酒夫祭祀以酒爲本長者主之故
以祭酒爲稱漢之侍中魏之散騎常侍高功者竝爲
祭酒焉公府祭酒蓋因其名也長史從事中郎主
吏司馬主將主簿祭酒舍人主閣內事參軍掾屬
令史主諸曹事司徒若無公唯省舍人其府常置
其職寮異於餘府有左右長史左西曹掾屬各二人

餘則同矣餘府有公則置無則省晉元帝為鎮東大將軍及丞相置從事中郎無定員分掌諸曹有錄事中郎度支中郎三兵中郎其參軍則有諮議參軍二人主諷議事晉江左初置因軍諮祭酒也宋高祖為諮議參軍無定員今諸曹則有錄事記室戶曹倉曹中直兵外兵騎兵長流賊曹刑獄賊曹城局賊曹法曹田曹水曹鎧曹車曹士曹集右戶墨曹凡十八曹參軍參軍不署曹者無定員江左初晉元帝鎮東丞相府有錄事記室

東曹西曹度支戶曹法曹金曹倉曹理曹中
兵外兵騎兵典兵兵曹賊曹運曹禁防典賓鎧
曹田曹士曹騎士車曹參軍其東曹西曹度支
金曹理典兵兵曹賊曹運曹禁防典賓騎士車
曹凡十三曹今闕所餘十二曹也其後又有直
兵長流刑獄城局水曹右戶墨曹七曹高祖爲
相合中兵直兵置一參軍曹則猶二也今小府不
置長流參軍者置禁防參軍蜀丞相諸葛亮
府有行參軍晉太傅司馬越府又有行參軍兼

行參軍後漸加長兼字除拜則爲參軍事府
板則爲行參軍晉末以來參軍事行參軍又
各有除板板行參軍不則長兼行參軍參軍
督護江左置本皆領營有部曲今則無矣公府
長史司馬秩千石從事中郎六百石東西曹掾四
百石他掾三百石屬二百石

特進前漢世所置前後二漢及魏晉以爲加官
從本官車服無吏卒晉惠帝元康中定位今
在諸公下驃騎將軍上

驃騎將軍一人漢武帝元狩二年始用霍去病
爲驃騎將軍漢西京制大將軍驃騎將軍位次
丞相

車騎將軍一人漢文帝元年始用薄昭爲車騎
將軍魚豢曰魏世驃騎爲都督儀與四征同若
不爲都督雖持節屬四征者與前後左右雜號
將軍同其或散還從文官之例則位次三司晉宋
車騎衛不復爲四征所督也

衛將軍一人漢文帝元年始用宋昌爲衛將軍

三號位亞三司漢章帝建初三年始使車騎將軍馬防班同三司班同三司自此始也漢末奮威將軍晉汪右伏波輔國將軍竝加大而儀同三司江左以來將軍則中鎮撫四鎮以上或加大餘官則左右光祿大夫以上竝得儀同三司自此以下不得也

持節都督無定員前漢遣使始有持節光武建武初征伐四方始權時置督軍御史事竟罷建安中魏武帝爲相始遣大將軍督軍二十一年

征孫權還夏侯惇督二十六軍是也魏文帝黃
初二年始置都督諸州軍事或領刺史三年上
軍大將軍曹眞都督中外諸軍事假黃鉞則總
統外內諸軍矣明帝太和四年晉宣帝征蜀加
號大都督高貴公正元二年晉文帝都督中外
諸軍尋加大都督晉世則都督諸軍爲上監諸
軍次之督諸軍爲下使持節爲上持節次之假
節爲下使持節得殺二千石以下持節殺無官位
人若軍事得與使持節同假節唯軍事得殺犯

軍令者晉江左以來都督中外尤重唯王導居之宋氏人臣則無也江夏王義恭假黃鉞假黃鉞則專戮節將非人臣常器矣

征東將軍一人漢獻帝初平三年馬騰居之

征南將軍一人漢光武建武中岑彭居之

征西將軍一人漢光武建武中馮異居之

征北將軍一人魚豢曰四征魏武帝置秩二千

黃初中位次三公漢舊諸征與偏裨雜號同

鎮東將軍一人後漢末魏武帝居之

鎮南將軍一人後漢末劉表居之

鎮西將軍一人後漢初平三年韓遂居之

鎮北將軍一人

中軍將軍一人漢武帝以公孫敖爲之時爲雜號
鎮軍將軍一人魏以陳羣爲之

撫軍將軍一人魏以司馬宣王爲之

中鎮撫三號比四鎮

安東將軍一人後漢末陶謙爲之

安南將軍一人

安西將軍一人後漢末段熲爲之

安北將軍一人魚豢曰鎮北四安魏黃初太和

中置

平東將軍一人

平南將軍一人

平西將軍一人

平北將軍一人四平魏世置

左將軍

右將軍

前將軍

後將軍

左將軍以下周末官秦漢並因之光武建武七
年省魏以來復置

征虜將軍漢光武建武中始以祭遵居之

冠軍將軍楚懷王以宋義爲卿子冠軍冠軍之
名自此始也魏正始中以文欽爲冠軍將軍揚
州刺史

輔國將軍漢獻帝以伏完居之宋太宗泰始

四年改爲輔師後廢帝元徽二年復故

龍驤將軍晉武帝始以王濬居之

東中郎將漢靈帝以董卓居之

南中郎將漢獻帝建安中以臨淄侯曹植居之

西中郎將

北中郎將漢建安中以隰陵侯曹鄴居之凡四

中郎將何承天去竝後漢置

建威將軍漢光武建武中以耿弇爲建武大

將軍

振威將軍後漢初宋登爲之

奮威將軍前漢世任千秋爲之

揚威將軍魏置

廣威將軍魏置

建武將軍魏置

振武將軍前漢末王況爲之

奮武將軍後漢末呂布爲之

揚武將軍光武建武中以馬成爲之

廣武將軍晉江左置

鷹揚將軍漢建安中魏武以曹洪居之
折衝將軍漢建安中魏武以樂進居之
輕車將軍漢武帝以公孫賀爲之

揚烈將軍建安中以假公孫淵

寧遠將軍晉江左置

材官將軍漢武帝以李息爲之

伏波將軍漢武帝征南越始置此號以路博德
爲之

凌江將軍魏置自凌江以下則有宣威明威驤

威厲威威厲威寇威虜威戎威武武烈武毅武
奮綏遠綏邊綏戎討寇討虜討難討夷蕩寇蕩
蕩虜蕩難蕩逆殄寇殄虜殄難掃夷掃寇掃虜
掃難掃逆厲武厲鋒虎威虎牙廣野橫野偏將
軍裨將軍凡四十號其威虜漢光武以馬浚居
之虎牙以蓋延居之爲虎牙大將軍橫野以耿
純居之蕩寇漢建安中蒲寵居之虎威于禁居
之其餘或是後漢及魏所置今則或置或不自
左右前後將軍以下至此四十號唯四中郎將

各一人餘皆無定負自車騎以下爲刺史又都督及儀同三司者置官如領兵但云都督不儀同三司者不置從事中郎置功曹一人主吏在主簿上漢末官也漢東京司隸有功曹從事史如諸州治中因其名也功曹參軍一人主佐記室下戶曹上監以下不置咨議記室餘則同矣宋太宗已來皇子皇弟雖非都督亦置記室參軍小號將軍爲大郡邊守置佐吏者又置長史餘則同也

太常一人舜攝帝位命伯夷作秩宗掌三禮即其任也周時曰宗伯是爲春官掌邦禮秦改曰奉常漢因之景帝六年更名曰太常應劭曰欲令國家盛大常存故稱太常前漢常以列侯忠孝敬慎者居之後漢不必列侯也

博士班固云秦官吏臣案六國時往往有博士掌通古今漢武建元五年初置五經博士宣成之世五經家法稍增經置博士一人至東京凡十四人易施孟梁丘京氏尚書歐陽大小夏侯詩齊

言八十一
魯韓禮大小戴春秋嚴顏各一博士而聰明
有威重者一人爲祭酒魏及晉西朝置十九人
江左初減爲九人皆不知掌何經元帝末增儀
禮春秋公羊博士各一人合爲十一人後又增
爲十六人不復分掌五經而謂之太學博士也
秩六百石

國子祭酒一人

國子博士二人

國子助教十人周易尚書毛詩禮記周官儀

禮春秋左氏傳公羊穀梁各爲一經論語孝經
爲一經合十經助教分掌國子周舊名周有師
氏之職即今國子祭酒也晉初復置國子學以
教生徒而隸屬太學蓋晉初助教十五人江左
以來損其員自宋世若不置學則助教唯置一
人而祭酒博士常置也

太廟令一人丞一人並前漢置西京曰長東京
曰令領齋郎二十四人

明堂令一人丞一人丞漢東京初置令宋世

祖大明中置

太祝令一人丞一人掌祭祀讀祝迎送神太祝
周舊官也漢西京置太祝令丞武帝太初元年
更名曰廣記漢東京改曰太祝

太史令一人丞一人掌三辰時日祥瑞妖災歲
終則奏新曆太史三代舊官周世掌建邦之
六典正歲年以序事頒朔于邦國又有馮相氏
掌天文次序保章氏掌天文今之太史則并
周之太史馮相保章三職也漢西京曰太史

令漢東京有二丞其一在靈臺

太樂令一人丞一人掌凡諸樂事周時爲大司
樂漢西京曰太樂令漢東京曰大子樂令魏復
爲太樂令

陵令每陵各一人漢舊官也

乘黃令一人掌乘輿車及安車諸馬魏世置自
博士至乘黃令並屬太常

光祿勳一人丞一人光明也祿爵也勳功也秦曰
郎中令漢因之漢武太初元年更名光祿勳掌

三署郎郎執戟衛宮殿門戶光祿勳居禁中如御史有獄在殿門外謂之光祿外部光祿勳郊祀掌三獻魏晉以來光祿勳不復居禁中又無復三署郎唯外宮朝會則以名到焉二臺奏劾則符光祿加禁止解禁止亦如之禁止身不得入殿省光祿主殿門故也宮殿門戶至今猶屬晉哀帝興寧二年省光祿勳并司徒孝武寧康元年復置漢東京三署郎有行應四科者歲舉茂才二人四行二人及三署郎罷省光祿勳

猶依舊舉四行衣冠子弟充之三署者五官署
左署右署也各置中郎將以司之郡舉孝廉
以補三署郎年五十以上屬五官其次分在左
右署凡有中郎議郎侍郎郎中四等無負多
至萬人

左光祿大夫

右光祿大夫二大夫晉初置光祿大夫秦時爲
中大夫漢武太初元年更名光祿大夫晉初又
置左右光祿大夫而光祿大夫如故光祿大夫

銀章青綬其重者加金章紫綬則謂之金紫
光祿大夫舊秩比二千石

中散大夫王莽所置後漢因之前漢大夫皆無
負掌論議後漢光祿大夫三人中大夫二十人
中散大夫三十人魏以來復無負自左光祿大
夫以下養老疾無職事中散六百石

衛尉一人丞二人掌宮門屯兵秦官也漢景初
改爲中大夫後元年復爲衛尉晉江右掌冶鑄
領冶令三十九戶五千三百五十冶皆在江北

而江南唯有梅根及冶塘二治皆屬揚州不屬
衛尉衛尉江左不置宋世祖孝建元年復置舊
一丞世祖增置一丞

廷尉一人丞一人掌刑辟凡獄必質之朝廷與
衆共之之義兵獄同制故曰廷尉舜攝帝位咎
繇作士即其任也周時大司寇爲秋官掌邦刑
秦爲廷尉漢景帝中六年更名大理武帝建元
四年復爲廷尉哀帝元壽二年復爲大理漢東
京初復爲廷尉

宋書志卷九
廷尉正一人

廷尉監一人正監並秦官本有左右監漢光武省右猶云左監魏晉以來直云監

廷尉評一人漢宣帝地節三年初置左右評漢光武省右猶云左平魏晉以來直云評正監評並以下官禮敬廷尉卿正監秩千石評六百石廷尉律博士一人魏武初建魏國置

大司農一人丞一人掌九穀六畜之供膳羞者舜攝帝位命棄爲后稷即其任也周則爲太

府秦治粟內史漢景帝後元年更名大農令武帝太初元年更名曰大司農晉哀帝末省并都水孝武世復置漢世丞二人魏以來一人太倉令一人丞一人秦官也晉江左以來又有東倉石頭倉丞各一人

導官令一人丞一人掌春御米漢東京置導擇也擇米令精也司馬相如封禪書云導一莖六穗於庖

藉田令一人丞一人掌耕宗廟社稷之田於周

爲甸師漢文帝初立藉田置令丞各一人漢東
京及魏竝不置晉武太始十年復置江左省宋
太祖元嘉中又置自太倉至藉田令竝屬司農
少府一人丞一人掌市服御之物秦官也漢因
之掌禁錢以給私養故曰少府晉哀帝末省
并丹陽孝武世復置

左尚方令丞各一人

右尚方令丞各一人竝掌造軍器秦官也漢因之於
周則爲玉府晉江右有中尚方左尚方右尚方江

左以來唯一尚方宋高祖踐阼以相府部配臺
謂之左尚方而本署謂之右尚方焉又以相府
細作配臺即其名置令一人丞二人隸門下世
祖大明中改曰御府置令一人丞一人御府二漢
世典官婢作褻衣服補浣之事魏晉猶置其
職江左乃省焉後廢帝初省御府置中署隸
右尚方漢東京太僕屬官有考工令主兵器弓
弩刀鎧之屬成則傳執金吾入武庫及織綬諸
雜工尚方令唯主作御刀綬劍諸玩好器物而

已然則考工令如今尚方令如今中署矣
東冶令一人丞一人

南冶令一人丞一人漢有鐵官晉置令掌工徒
鼓鑄隸衛尉江左以來省衛尉度隸少府宋世
雖置衛尉冶隸少府如故江南諸郡縣有者或
置冶令或置丞多是吳所置

平准令一人丞一人掌染秦官也漢因之漢隸
司農不知何世隸少府宋順帝即位避帝諱改
曰染署

將作大匠一人丞一人掌土木之役秦世置將作少府漢因之景帝中六年更名將作大匠光武二年省以謁者領之章帝建初元年復置晉氏以來有事則置無則省

大鴻臚掌贊導導拜授諸王秦世爲典客漢景帝中六年更名大行令武帝太初元年更名大鴻臚鴻大也臚陳也晉江左初省有事則權置事畢即省

太僕掌輿馬周穆王所置秦因之周官則校人

掌馬巾車尚車及置太僕兼其任也晉江左或
置或省宋以來不置郊祀則權置太僕執轡事
畢即省

太后十卿各一人應氏漢官曰衛尉少府秦官
太僕漢成帝置皆隨太后宮爲號在正卿上無
太后乃闕魏改漢制在九卿下晉復舊在同號
卿上

大長秋皇后卿也育后則置無則省秦時爲將
行漢景帝中六年更名大長秋韋曜曰長秋者

以皇后陰官秋者陰之始取其終而長欲其久也自太常至長秋皆置功曹主簿五官漢東京諸郡有五官掾因其名也漢制卿尹秩皆中二千石丞一千石

尚書古官也舜攝帝位命龍作納言即其任也周官司會鄭玄云若今尚書矣秦世少府遣吏四人在殿中主發書故謂之尚書尚猶主也漢初有尚冠尚衣尚食尚浴尚席尚書謂之六尚戰國時已有尚冠尚衣之屬矣秦時

有尚書令尚書僕射尚書丞至漢初竝隸少府
漢東京猶文屬焉古者重武官以善射者掌
事故曰僕射僕射者僕役於射事也秦世有左
右曹諸吏官無職事將軍大夫以下皆得加此
官漢武帝世使左右曹諸吏分平尚書事昭
帝即位霍光領尚書事成帝初王鳳錄尚書
事漢東京每帝即位輒置太傅錄尚書事薨
輒省晉康帝世何充讓錄表曰咸康中分置三
錄王導錄其一荀崧陸曄各錄六條事然則

似有二十四條若止有十二條則荀陸各錄六條
導又何所司乎若導摠錄荀陸分掌則不得復
云導錄其一也其後每置二錄輒云各掌六條
事又是止有十二條也十二條者不知悉何條
晉江右有四錄則四人參錄也江右張華江左
庾亮竝經關尚書七條則亦不知皆何事也後
何充解錄又參關尚書錄尚書職無不摠王
肅注尚書納于大麓曰堯納舜於尊顯之官大
錄萬機之政也凡重號將軍刺史皆得命曹

授用唯不得施除及加節宋世祖孝建中不欲
威權外假省錄大明末復置此後或置或省漢
獻帝建安四年以執金吾榮邵爲尚書左僕射
衛臻爲右僕射二僕射分置自此始也漢成帝
建始四年初置尚書員四人增丞亦爲四人曹
尚書其一曰常侍曹主公卿事其二曰二千石
曹主郡國二千石事其三曰民曹主吏民上書
事其四曰客曹主外國夷狄事光武分二千石
曹爲二又分客曹爲南主客曹北主客曹改

常侍曹爲吏曹凡六尚書減二丞唯置左右二丞而已應劭漢官云尚書令左丞總領綱紀無所不統僕射右丞掌稟假錢穀三公尚書二人掌天下歲盡集課吏曹掌選舉齋祠二千石曹掌水火盜賊詞訟罪法客曹掌羌胡朝會法駕出護駕民曹掌繕治功作鹽池苑囿吏曹任饗多得超遷則漢末曹名及職司又與光武時異也魏世有吏部左民民曹五兵度支五曹尚書晉初有吏部三公客曹駕部屯田度支六曹尚

書武帝咸寧二年省駕部尚書四年又置太康
中有吏部殿中五兵田曹度支左民六尚書惠
帝世又有右民尚書尚書止於六曹不知此時
省何曹也江左則有祠部吏部左民度支五兵
合爲五曹尚書宋高祖初又增都官尚書若有
右僕射則不置祠部尚書世祖大明二年置二
吏部尚書五兵尚書後還置一吏部尚書順帝
昇明元年又置五兵尚書

尚書令任總機衡僕射尚書分領諸曹左僕射

領殿中主客二曹吏部尚書領吏部刪定三公
比部四曹祠部尚書領祠部儀曹二曹度支尚
書領度支金部倉部起部四曹左民尚書領左
民駕部二曹都官尚書領都官水部庫部功部
四曹五兵尚書領中兵外兵二曹昔有騎兵別
兵都兵故謂之五兵也五尚書二僕射一令謂
之八坐若營宗廟宮室則置起部尚書事畢省
漢成帝之置四尚書也無置郎之文漢儀尚書
郎四人一人主匈奴單于營部一人主菟夷吏

民一人主戶口墾田一人主財帛委輸匈奴單于宣帝之世保塞內附成帝世單于還北庭矣一郎主匈奴單于也營部則置郎疑是光武時所主匈奴是南單于也漢官云置郎三十六人不知是何帝增員然則一尚書則領六郎也主作文書起立事草初爲郎中滿歲則爲侍郎尚書寺居建禮門內尚書郎入直官供青縑白綾被或以綿縑爲之給帷帳氈褥通中枕太官供食物湯官供餅餌及五熟果實之屬給尚書伯

使一人女侍二人皆選端正妖麗執香爐護衣服奏事明光殿殿以胡粉塗壁畫古賢烈士以丹朱色地謂之丹墀尚書郎口含雞舌香以其奏事荅對欲使氣息芬芳也奏事則與黃門侍郎對揖黃門侍郎稱已聞乃出天子所服五時衣以賜尚書令僕而丞郎月賜赤管大筆一雙隃麋墨一丸魏世有殿中吏部駕部金部虞曹比部南主客祠部度支庫部農部水部儀曹三公倉部民曹二千石中兵外兵別兵都兵考功

定科凡二十三郎青龍二年有軍事尚書令陳
矯奏置都官騎兵二曹郎合爲二十五曹晉西
朝則直事殿中祠部儀曹吏部三公比部金部
倉部度支都官二千石左民右民虞曹屯田起
部水部左主客右主客駕部車部庫部左中兵
右中兵左外兵右外兵別兵都兵騎兵左士右
士北主客南主客爲三十四曹郎後又置運曹
凡三十五曹晉江左初無直事民屯田車部別
兵都兵騎兵左士右士運曹十曹郎而主客中

兵各置一郎而已所餘十七曹也康穆以來又
無虞曹二千石二郎猶有殿中祠部吏部儀曹
三公比部倉部度支都官左民都部水部主客
駕部庫部中兵十八曹郎後又省主客起部水
部餘十五曹宋高祖初加置騎兵主客起部水
部四曹郎合爲十九曹太祖元嘉十年又省儀
曹主客比部騎兵四曹郎十一年又並置十八
年增刪定曹郎次在左民曹上蓋魏世之定科
郎也三十年又置功論郎次都官之下在刪定

之上太宗世省騎兵今凡二十曹郎以三公比部主法制度支主筭支派也度景也都官主軍事刑獄其餘曹所掌各如其名漢制公卿御史中丞以下遇尚書令僕丞郎皆車豫相回避臺官過乃得去今尚書官上朝及下禁斷行人猶其制也漢又制丞郎見尚書呼曰明時郎見二丞呼曰左君右君郎以下則有都令史令史書令史書吏榦漢東京尚書令史十八人晉初正令史百二十人書令史百三十人自晉至今或減

或益難以定言漢儀有丞相令史令史蓋前漢
官也晉西朝有尚書都令史朱誕則都令史其
來久矣分曹所掌如尚書也晉西朝八坐丞郎
朝晡詣都坐朝江左唯旦朝而已八坐丞郎初拜
竝集都坐交禮遷又解交漢舊制也今唯八坐
解交丞郎不復解交也尚書令千石僕射尚書
六百石丞郎四百石

武庫令一人掌軍器秦官至三漢屬金吾晉初
罷執金吾至今隸尚書庫部

車府令一人丞一人秦官也二漢魏晉並隸太僕
太僕既省隸尚書駕部

上林令一人丞一人漢西京上林中有八丞十二尉
十池監丞尉屬水衡都池監隸少府漢東京曰
上林苑令及丞各一人隸少府晉江左闕宋世祖
大明三年復置隸尚書殿中曹及少府

材官將軍一人司馬一人主工匠土木之事漢左
右校令其任也魏右校又置材官校尉主天下
材木事晉江左改材官校尉曰材官將軍又罷

左校令今材官隸尚書起部及領軍

侍中四人掌奏事直侍左右應對獻替法駕出則正直一人負璽陪乘殿內門下衆事皆掌之周公戒成王立政之篇所云常伯即其任也侍中本秦丞相史也使五人往來殿內東廂奏事故謂之侍中漢西京無負多至數十人入侍禁中分掌乘輿服物下至褻器虎子之屬武帝世孔安國爲侍中以其儒者特聽掌御唾壺朝廷榮之从次者爲僕射漢東京又屬少府猶無負掌

侍左右贊導衆事顧問應答法駕出則多識者一人負傳國璽操斬白蛇劔參乘餘皆騎在乘輿車後光武世改僕射爲祭酒焉漢世與中官俱止禁中武帝時侍中莽荷羅挾刃謀逆由是侍中出禁外有事乃入事畢即出王莽秉政侍中復入與中官共止章帝元和中侍中郭舉與後宮通技佩刀驚御舉伏誅侍中由是復出外魏晉以來置四人別加官不主數秩比二千石

志第二十九

宋書三十九



大正十二年

三月

志第三十

宋書四十



臣沈

約

百官下

給事黃門侍郎四人與侍中俱掌衆事郊廟臨
軒則一人執麾漢百官表奏曰給事黃門無負
掌侍從左右漢因之漢東京曰給事黃門侍郎
亦無負掌侍從左右關通中外諸王朝見則引
王朝坐應劭曰每日莫向青鎖門拜謂之夕郎
史臣按劉向與子歆書曰黃門郎顯處也然則

前漢世已爲黃門侍郎矣董巴漢書曰禁門曰黃闥中人主之故號曰黃門令然則黃門郎給事黃闥之內故曰黃門郎也魏晉以來貞四人六百石

公車令一人掌受章奏秦有公車司馬令屬衛尉漢因之掌宮南闕門凡吏民上章四方貢獻及徵詣公車者皆掌之晉江左以來直云公車令

太醫令一人丞一人周官爲醫師秦爲太醫令

至二漢屬少府太官令一人丞一人周官爲膳夫秦爲太官令至漢屬少府

驛驪廐丞一人漢西京爲龍馬長漢東京爲未央廐令魏爲驛驪令自公車令至此隸侍中

散騎常侍四人掌侍左右秦置散騎又置中常侍散騎並乘輿車後中常侍得入禁中皆無負竝爲加官漢東京初省散騎而中常侍因用宦者魏文帝黃初初置散騎合於中常侍謂之散騎常侍始以孟達補之次者爲祭酒散騎常侍秩比二千石

通直散騎常侍四人魏末散騎常侍又有在員外者晉武帝使二人與散騎常侍通直故謂之通直散騎常侍晉江左置五人員外散騎常侍魏末置無員

散騎侍郎四人魏初與散騎常侍同置魏晉散騎常侍侍郎與侍中黃門侍郎共平尚書奏事江左乃罷通直散騎侍郎四人初晉武帝置員外散騎侍郎四人元帝使二人與散騎侍郎通直故謂之通直散騎侍郎後增爲四人員外散

騎侍郎晉武帝置無負

給事中無負漢西京置掌顧問應對位次中常侍漢東京省魏世復置

奉朝請無負亦不爲官漢東京罷省三公外戚宗室諸侯多奉朝請奉朝請者奉朝會請召而已晉武帝亦以宗室外戚爲奉車駙馬騎都尉而奉朝請焉元帝爲晉王以參軍爲奉車都尉掾屬爲駙馬都尉行參軍舍人爲騎都尉皆奉朝請後省奉車騎都尉唯畱駙馬都尉奉朝請

宋書志三
永初已來以奉朝請選雜其尚主者唯拜駙馬
都尉三都尉竝漢武帝置孝建初奉朝請省駙
馬都尉三都尉秩比二千石

中書令一人

中書舍人一人

中書侍郎四人

中書通事舍人四人漢武帝游後廷始使宦者
典尚書事謂之中書謁者置令僕射元帝時令
弘恭僕射石顯秉勢用事權傾內外成帝改中

書謂者令曰中謁者令罷謁者漢東京省中謁者令而有中宮謁者令非其職也魏武帝爲王置祕書令典尚書奏事又其任也文帝黃初初改爲中書令又置監及通事郎次黃門郎黃門郎已署事過通事乃奉以入爲帝省讀書可晉改曰中書侍郎貞四人晉江左初改中書侍郎曰通事郎尋復爲中書侍郎晉初置舍人一人通事一人江左初舍人通事謂之通事舍人掌呈奏案章後省通事中書差侍郎一人直西

省又掌詔命宋初又置通事舍人而侍郎之任輕矣舍人直閣內隸中書其下有主事本用武官宋改用文吏

祕書監一人

祕書丞一人

祕書郎四人漢桓帝延熹二年置祕書監皇甫規與張奐書云從兄祕書它何動靜是也應劭漢官曰祕書監一人六百石後省魏武帝爲魏王置祕書令祕書丞祕書典尚書奏事文帝黃

初初置中書令典尚書奏事而祕書改令
爲監後欲以何禎爲祕書丞而祕書先自
有丞乃以禎爲祕書右丞後省掌藝文圖
籍周官外史掌四方之志三皇五帝之書
即其任也漢西京圖籍所藏有天府石渠
蘭臺石室延閣廣內之府是也東京圖書
在東觀晉武帝以祕書并中書省監謂丞
爲中書祕書丞惠帝復置著作郎一人佐
郎八人掌國史周世左史記事右史記言

即其任也漢東京圖籍在東觀故使名儒
碩學著作東觀撰述國史著作之名自此
始也魏世隸中書晉武世繆徵爲中書著
作郎元康中改隸秘書後別自爲省而猶
隸秘書著作郎謂之大著作專掌史任晉
制著作佐郎始到職必撰名臣傳一人宋
氏初國朝始建未有合撰者此制遂替
矣

領軍將軍一人掌內軍漢有南北軍衛京師武

帝置中壘校尉掌北軍營光武省中壘校尉置
北軍中候監五校營魏武爲丞相相府自置領軍非
漢官也文帝即魏王位魏始置領軍主五校中壘武
衛三營晉武帝初省使中軍將軍羊祜統二衛
前後左右驍騎七軍營兵即領軍之任也祜遷
罷復置北軍中候北軍中候置丞一人懷帝永
嘉中改曰中領軍元帝永昌元年復改曰北軍中
候尋復爲領軍成帝世復以爲中候而陶回居之
尋復爲領軍領軍令猶有南軍都督

護軍將軍一人掌外軍秦時護軍都尉漢因之
陳平爲護軍中尉盡護諸將然則復以都尉爲
中尉矣武帝元狩四年以護軍都尉屬大司馬于
時爲都尉矣漢書李廣傳廣爲驍騎將軍屬
護軍將軍蓋護軍護諸將軍哀帝元壽元年
更名護軍都尉曰司寇平帝元始元年更名護
軍都尉東京省班固爲大將軍中護軍隸將軍
莫府非漢朝列職魏武爲相以韓浩爲護軍史
奐爲領軍非漢官也建安十二年改護軍爲中

護軍領軍爲中領軍置長史司馬魏初因置護
軍主武官選隸領軍晉世則不隸也晉元帝永
昌元年省護軍并領軍明帝大寧二年復置魏
晉江左領護各領營兵江左以來領軍不復別
營總統二衛驍騎材官諸軍猶別有營也領護
資重者爲領軍護軍將軍資輕者爲中領軍中
護軍官屬有長史司馬功曹主簿五官受命出
征則置參軍

左衛將軍一人

右衛將軍一人二衛將軍掌宿衛營兵二漢魏
不置晉文帝爲相國相國府置中衛將軍武帝
初分中衛置左右衛將軍以羊琇爲左衛趙序
爲右衛二衛江右有長史司馬功曹主簿江左
無長史

驍騎將軍漢武帝元光六年李廣爲驍騎將軍
魏世置爲內軍有營兵高功者主之先有司馬
功曹主簿後省

游擊將軍漢武時韓說爲游擊是爲六軍

左軍將軍

右軍將軍

前軍將軍

後軍將軍魏明帝時有左軍將軍然則左軍魏
官也晉武帝初置前軍右軍太始八年又置後
軍是爲四軍

左中郎將

右中郎將秦官漢因之與五官中郎將領三署
郎魏無三署郎猶置其職晉武帝省宋世祖大

明中又置

屯騎校尉

步兵校尉

越騎校尉

長水校尉

耿聲校尉五校並漢武帝置屯騎步兵掌上林苑

門屯兵越騎掌越人來降因以爲騎也一說取其

材力超越也長水掌長水宣曲胡騎長水胡部落

右也胡騎屯宣曲觀下韋曜曰長水校尉典胡

騎殿近長水故以爲名長水蓋關中小水名也射聲掌射聲士聞聲則射之故以爲名漢光武初改屯騎爲驍騎越騎爲青巾建武十五年復舊漢東京五校典宿衛士自游擊至五校魏晉逮于江左初猶領營兵並置司馬功曹主簿後省二中郎將本不領營也五營校尉秩二千石

虎賁中郎將周官有虎賁氏漢武帝建元三年始微行出遊選材力之士執兵從送期之諸門故名期門無負多至千人平帝元始元年更名曰虎

賁郎置中郎將領之虎賁舊作虎奔言如虎之
奔走也王莽輔政以古有勇士孟賁故以奔爲
賁比三千石

亢從僕射漢東京有中黃門亢從僕射非其職
也魏世因其名而置亢從僕射

羽林監漢武帝太初元年初置建章營騎亦掌
從送次期門後更名羽林騎置令丞宣帝令中
郎將騎都尉監羽林謂之羽林中郎將漢東京又
置羽林左監羽林右監至魏世不改晉罷羽林中

郎將又省一監置一監而已自虎賁至羽林是爲
三將哀帝省宋高祖永初初復置江右領營兵
江左無復營兵羽林監六百石

積射將軍

彊弩將軍漢武帝以路博德爲彊弩校尉李沮
爲彊弩將軍宣帝以許延壽爲彊弩將軍彊弩
將軍至東漢爲雜號前漢至魏無積射晉太康
十年立射營弩營置積射彊弩將軍主之自驍騎
至彊弩將軍先並各置一人宋太宗泰始以來多

以軍功得此官今竝無復負

殿中將軍

殿中司馬督晉武帝時殿內宿衛號曰三部司馬
置此二官分隸左右二衛江右初負十人朝會宴
饗則將軍戎服直侍左右夜開城諸門則執白
虎幡監之晉孝武太元中改選以門閤居之宋高
祖永初初增爲二十人其後過負者謂之殿中負
外將軍負外司馬督其後竝無復負

武衛將軍無負初魏王始置武衛中郎將文帝

踐阼改爲衛將軍主禁旅如今二衛非其任也
晉氏不常置宋世祖大明中復置代殿中將軍
之任比負外散騎侍郎

武騎常侍無負漢西京官車駕游獵常從軼猛
獸後漢魏晉不置宋世祖大明中復置比奉朝
請

御史丞一人掌奏劾不法時御史大夫有二丞
其一曰御史丞其二曰御史中丞殿中蘭臺祕
書圖籍在焉而中丞居之外督部刺史內領侍

御史受公卿奏事舉劾按章時中丞亦受奏事然則分有所掌也成帝綏和元年更名御史大夫爲大司空置長史而中丞官職如故哀帝建平二年復爲御史大夫元壽二年復爲大司空而中丞出外爲御史臺主名御史長史光武還曰中丞又屬少府獻帝時更置御史大夫自置長史一人不復領中丞也漢東京御史中丞遇尚書丞郎則中丞止車執版揖而丞郎坐車舉手禮之而已不知此制何時省中丞每月二十

五日繞行宮垣白壁史臣按漢志執金吾每月
三繞行宮城疑是省金吾以此事併中丞中丞
秩千石

治書侍御史掌舉劾官品第六已上漢宣帝齋
居決事令御史二人治書因謂之治書御史漢
東京使明法律者爲之天下讞疑事則以法律
當其是非魏晉以來則分掌侍御史所掌諸曹
若尚書二丞也

侍御史於周爲柱下史周官有御史掌治令亦

其任也秦置侍御史漢因之二漢員竝十五人
掌察舉非法受公卿奏事有違失者舉劾之凡
有五曹一曰令曹掌律令二曰印曹掌刻印三
曰供曹掌齋祠四曰尉馬曹掌官廐馬五曰乘
曹掌護駕魏置御史八人有治書曹掌度支運
課第曹掌考課不知其餘曹也晉西朝凡有吏
曹課第曹直事曹印曹中都督曹外都督曹媒
曹符節曹水曹中堅曹營軍曹筭曹法曹凡十
三曹而置御史九人晉江左初省課第曹置庫

曹掌廐牧牛馬市租後復分庫曹置外左庫內
左庫二曹宋太祖元嘉中省外左庫而內左庫
直云左庫世祖大明中復置廢帝景和元年又
置順帝初省營軍併水曹省筭曹併法曹吏曹
不置御史凡十御史焉魏又有殿中侍御史二
人蓋是蘭臺遣二御史居殿內察非法也晉西
朝四人江左二人秦漢有符節令隸少府領符
璽郎符節令史蓋周禮典瑞掌節之任也漢至
魏別爲一臺位次御史中丞掌授節銅虎符竹

使符晉武帝太始九年省并蘭臺署符節御史掌其事焉

謁者僕射一人掌大拜授及百官班次領謁者十人謁者掌小拜授及報章蓋秦官也謁請也應是漢官曰堯以試舜賓于四門是其職也秦世謁者七十人漢因之後漢百官志謁者僕射掌奉引和帝世陳郡向熈爲謁者僕射贊拜殿中音動左右然則又有常侍謁者五人謁者則置三十五人半減西京也二漢並隸光祿勳魏

世置謁者十人晉武帝省僕射以謁者隸蘭臺
江左復置僕射後又省宋世祖大明中復置秩
比千石

都水使者一人掌舟航及運部秦漢有都水長
丞主陂池灌溉保守河渠屬太常漢東京省都
水置河隄謁者魏因之漢世水衡都尉主上林
苑魏世主天下水軍舟船器械晉武帝省水衡
置都水使者而河隄爲都水官屬有參軍二人
謁者一人令史減置無常貞晉西朝有參軍而

無謁者謁者則江左置也懷帝永嘉六年胡入洛陽都水使者爰濬先出督運得免然則武帝置職便掌運矣江左省河隄

太子太傅一人丞一人

太子少傅一人丞一人傳古官也文王世子曰凡三王教世子太傅在前少傅在後竝以輔導爲職漢高帝九年以叔孫通爲太子太傅位次太常二漢竝無丞魏世無東宮然則晉氏置丞也晉武帝太始五年詔太子拜太傅少傅如弟

子事師之禮二傳不得上䟽曲敬二傳竝有功
曹主簿五官太傅中二千石少傅二千石

太子詹事一人丞一人職比臺尚書令領軍將
軍詹省也漢西京則太子門大夫庶子洗馬舍
人屬二傳率更令家令僕衛率屬詹事皆秦官
也後漢省詹事太子官屬悉屬少傅而太傅不
復領官屬晉初太子官屬通屬二傳咸寧元年
復置詹事二傳不復領官屬詹事一千石

家令一人丞一人晉世置漢世太子食湯沐邑

十縣家令主之又主刑獄飲食職比廷尉司農
少府漢東京主食官令食官令晉世自爲官不
復屬家令

率更令一人主宮殿門戶及賞罰事職如光祿
勳衛尉漢東京掌庶子舍人晉世則不也自漢
至晉家令在率更下宋則居上

僕一人漢世太子五日一朝非入朝日遣僕及
中允旦入請問起居主車馬親族職如太僕宗
正自家令至僕爲太子三卿三卿秩千石

門大夫二人漢東京置職如中郎將分掌遠近
表牋秩六百石

中庶子四人職如侍中漢東京員五人晉減爲
四人秩六百石

中舍人四人漢東京太子官屬有中允之職在
中庶子下洗馬上疑若令中書舍人矣中舍人
晉初置職如黃門侍郎

食官令一人職如太官令漢東京官也今屬中
庶子庶子四人職比散騎常侍中書監令晉制

也漢西京員五人漢東京無員職如三署中郎
古者諸侯世子有庶子之官秦因其名也秩四
百石

舍人十六人職如散騎中書侍郎晉制也二漢
無員掌宿衛如三署中郎

洗馬八人職如謁者祕書制也二漢員十六人
太子出則當直者前驅導威儀秩比六百石
太子左衛率七人

太子右衛率二人五率職如三衛秦時直云衛

率漢因之主門衛晉初曰中衛率太始分爲左右各領一軍惠帝時愍懷太子在東宮加置前後二率成都王穎爲太弟又置中衛是爲五率江左初省前後二率孝武太元中又置皆有丞晉初置宋世止置左右二率秩舊四百石

太子屯騎校尉

太子步兵校尉

太子翊軍校尉三校尉各七人並宋初置屯騎步兵因臺校尉翊軍晉武帝太康初置始爲臺

校尉而以唐彬居之江左省

太子冗從僕射七人宋初置

太子旅賁中都將十人職如虎賁中郎將宋初置周
官有旅賁氏漢制天子有虎賁王侯有旅賁旅衆也
太子左積弩將軍十人

太子右積弩將軍二人漢東京積弩將軍雜號
也無左右之積弩魏世至晉江左左右積弩爲
臺職領營兵宋世度東宮無復營矣

殿中將軍十人殿中員外將軍二十人宋初置

平越中郎將晉武帝置治廣州主南越

南蠻校尉晉武帝置治襄陽江左初省尋又置治江陵宋世祖孝建中省

西戎校尉晉初置長史安帝義熙中又置治中寧蠻校尉晉武帝置治襄陽以授魯宗之

南夷校尉晉武帝置治寧州江左改曰鎮蠻校尉四夷中郎校尉皆有長史司馬參軍魏晉有雜號護軍如將軍今猶有鎮蠻安遠等護軍鎮蠻以加廬江晉熙西陽太守安遠以加武陵內史

刺史每州各一人黃帝立四監以治萬國唐虞
世十二牧是其職也周改曰興秦曰監御史而更
遣丞相史分刺諸州謂之刺史刺之爲言猶參
覘也寫書亦謂之刺漢制不得刺尚書事是也刺
史班行六條詔書其一條曰彊宗豪右田宅踰
制以彊陵弱以衆暴寡其二條曰二千石不奉
詔書遵承典制背公向私旁詔守利侵漁百姓
聚斂爲姦其三條曰二千石不恤疑獄風厲殺
人怒則加罰喜則任賞煩擾苛暴剥戮黎元

爲百姓所疾山崩石裂妖祥譌言其四條曰二
千石選署不平苟阿所愛蔽賢寵頑其五條曰
二千石子弟恃怙榮勢請託所監其六條曰二
千石違公下比阿附豪彊通行貨賂割損正令
歲終則乘傳詣京師奏事成帝綏和元年改爲
牧哀帝建平二年復爲刺史前漢世刺史乘傳
周行郡國無適所治後漢世所治始有定處止
八月行部不復奏事京師晉江左猶行郡縣詔
棗據追遠詩曰先君爲鉅鹿太守迄今三紀忝

私爲冀州刺史班詔次于郡傳是也靈帝世天下漸亂豪桀各據有州郡而劉焉劉虞竝自九卿出爲益州幽州牧其任漸重矣官屬有別駕從事史一人從刺史行部治中從事史一人主財穀簿書兵曹從事史一人主兵事部從事史每郡各一人主察非法主簿一人錄閣下衆事省署文書門亭長一人主州正門功曹書佐一人主選用孝經師一人主試經月令師一人主時節祠祀律令師一人平律簿曹書佐一人主簿書

典郡書佐每郡各一人主一郡文書漢制也今有別駕從事史治中從事史主簿西曹書佐祭酒從事史議曹從事史部郡從事史自主簿以下置人多少各隨州舊無定制也晉成帝咸康中江州又有別駕祭酒居僚職之上而別駕從事史如故今則無也別駕西曹主吏及選舉事治中主衆曹文書事西曹即漢之功曹書佐也祭酒分掌諸曹兵賊倉戶水鎧之屬揚州無祭酒而主簿治事荊州有從事史在議曹從事史

下大較應是魏晉以來置也今廣州徐州有月
令從事若諸州之曹史漢舊名也漢武元封四
年令諸州歲各舉秀才一人後漢避光武諱改
茂才魏復曰秀才晉江左揚州歲舉二人諸州
舉一人或三歲一人隨州大小竝對策問晉東海
王越爲豫州牧牧置長史參軍庾凱爲長史謝
鯤爲參軍此爲牧者則無也牧二千石刺史六百石
郡守秦官秦滅諸侯隨以其地爲郡置守丞尉
各一人守治民丞佐之郡當邊戍者丞爲長史

晉江左皆謂之丞尉典兵備盜賊漢景帝中二年更名守曰太守尉爲都尉光武省都尉後又往往置東部西部都尉有蠻夷者又有屬國都尉漢末及三國多以諸部都尉爲郡晉成帝咸康七年又省諸郡丞宋太祖元嘉四年復置郡官屬略如公府無東西曹有功曹史主選舉五官掾主諸曹事部縣有都郵門亭長又有主記史催督期會漢制也今略如之諸郡各有舊俗諸曹名號往往不同漢武帝納董仲舒之言

元光元年始令郡國舉孝廉制郡口二十萬以上歲察一人四十萬以上二人六十萬三人八十萬四人百萬五人百二十萬六人不滿二十萬二歲一人不滿十萬三歲一人限以四科一曰德行高妙志節清白二曰學通行修經中博士三曰明習法令足以決疑能案章覆問文中御史四曰剛毅多略遭事不惑明足決斷材任三輔縣令魏初更制口十萬以上歲一人有秀異不拘戶口江左以丹楊吳會稽吳興並大郡歲各舉二人漢

制歲遣上計掾史各一人條上郡內衆事謂之階簿至今行之太守二千石丞六百石

縣令長秦官也大者爲令小者爲長侯國爲相漢制置丞一人尉大縣二人小縣一人五家爲伍伍長主之二五爲什什長主之十什爲里里魁主之十里爲亭亭長主之十亭爲鄉鄉有鄉佐三老有秩嗇夫游徼各一人鄉佐有秩主賦稅三老主教化嗇夫主爭訟游徼主姦非其餘諸曹略同郡職以五官爲廷掾後則無復丞唯

建康有獄丞其餘衆職或此縣有而彼縣無各有舊俗無定制也晉江右洛陽縣置六部都尉餘大縣置二人次縣小縣各一人宋太祖元嘉十五年縣小者又省之諸官府至郡各置五百者舊說古君行師從卿行旅從旅五百人也今縣令以上古之諸侯故立四五百以象師從旅從依古義也韋曜曰五百字本爲伍伯伍當也伯道也使之導引當道伯中以驅除也周制五百爲旅帥皆大夫不得卑之如此說也又周禮

秋官有條狼氏掌執鞭以趨辟王出入則八人夾道公則六人侯伯則四人子男則二人近之矣名之異爾又漢官中有伯使主爲諸官驅使辟路於道伯中故言伯使此其比也縣令千石至六百石長五百石

漢初王國置太傅掌輔導內史主治民丞相統衆官中尉掌武職分官置職略同京師至景帝懲七國之亂更制諸王不得治國漢爲置吏改丞相曰相省御史大夫廷尉少府宗正博士官

其大夫謁者諸官長丞皆損其負數後改漢內
史爲京兆尹中尉爲執金吾郎中令爲光祿勳
而王國如故又太僕爲僕司農爲大農成帝更
令相治民如郡太守省內史其中尉如郡尉太
傳但曰傳漢東京亦置傳一人王師事之相一
人主治民中尉一人主盜賊郎中令一人掌郎
中宿衛僕一人治書一人治書本曰尚書後更
名治書中大夫無負掌奉使京師及諸國者及
禮樂衛士醫工永巷祀禮長各一人郎中無負

魏氏謁者官屬史闕不知次第晉武帝初置師友文學各一人師即傳也景帝諱師改爲傳宋世復改曰師其文學前漢已置也友者因文王仲尼四友之名也改太守爲內史省相及僕有郎中令中尉大農爲三卿大國置左右常侍各三人省郎中置侍郎二人大國又置上軍中軍下軍三將軍次國上軍將軍下軍將軍各一人小國上軍而已典書典祠典衛學官令典書令丞各一人治書四人中尉司馬世子庶子陵廟

牧長各一人謁者四人中大夫六人舍人十人
典醫丞典府丞各一人宋氏以來一用晉制雖
大小國皆有三軍晉制典書令在常侍下侍郎
上江左則侍郎次常侍而典書令居三軍下矣
江左以來公國則無中尉常侍三軍侯國又無
大農侍郎伯子男唯典書以下又無學官令矣
吏職皆以次損省焉晉江右公侯以下置官屬
隨國小大無定制也晉江左諸國竝三分食一
元帝太興元年始制九分食一

太傅

太保

太宰

太尉

司徒

司空

大司馬

大將軍

諸位從公

右第一品

特進

驃騎車騎衛將軍

諸大將軍

諸持節都督

右第二品

侍中散騎常侍

尚書令僕朕尚書

中書監令祕書監

諸征鎮至龍驤將軍

光祿大夫

諸卿尹

太子二傳

大長秋

太子詹事

領護軍

縣侯

右第三品

二衛至五校尉

寧朔至五威五武將軍

四中郎將

刺史領兵者

戎蠻校尉

御史中丞都水使者

鄉侯

右第四品

給事中黃門散騎中書侍郎

謁者僕射

三將積射彊弩將軍

太子中庶子庶子三卿率

鷹揚至陵江將軍

刺史不領兵者

郡國太守內史相

亭侯

右第五品

尚書丞郎

治書侍御史侍御史

三都尉

博士

撫軍以上及持節都督領護長史司馬

公府從事中郎將

延尉正監評

祕書著作丞郎

王國公三卿師友文學

諸縣署令千石者

太子門大夫

殿中將軍司馬督

雜號護軍

關內侯

右第六品

謁者

殿中監

諸卿尹丞

太子傅詹事率丞

諸軍長史司馬六百石者

諸府參軍

戎蠻府長史司馬

公府掾屬

太子洗馬舍人食官令

一五
諸縣令六百石者

右第七品

內臺正令史

郡丞

諸縣署長

雜號宣威將軍以下

右第八品

內臺書令史

外臺正令史

諸縣署丞尉

右第九品凡新置不見此諸條者隨
秩位所視蓋右所定也

志第三十

宋書四十